

Neadekvatna reakcija Predsjedništva BiH na incident prilikom polaganja zakletve čini poduzimanje aktivnosti od strane EUFOR/NATO-a neizbježnim

Visoki predstavnik Paddy Ashdown danas je iskazao svoju punu podršku mjerama koje su najavili general major Leakey, zapovjednik EUFOR-a, i brigadni general Schook, zapovjednik štaba NATO-a u Sarajevu, kao odgovor na svečanost polaganja zakletve regruta 16. aprila 2005. godine u Bileći i na Manjači.

Prve mjere koje je ministar Stanković najavio 6. maja 2005. godine kao odgovor na ovaj događaj bile su u potpunosti neadekvatne. Bilo je jasno da su vlasti Republike Srpske namjerno potcijenile težinu ovih incidenata, što je dovelo u pitanje poštivanje jedinstvenog lanca komandovanja od strane VRS, kao i opredjeljenost VRS da obezbijedi profesionalnu vojnu službu. Jučer je Predsjedništvo BiH imalo priliku da ispravi situaciju, ali ju je propustilo. Kao rezultat toga, danas su zapovjednici EUFOR-a i NATO-a bili primorani da djeluju umjesto domaćih institucija.

U srijedu je prvi multietnički kontingent oružanih snaga BiH napustio zemlju da bi učestvovao u mirovnim operacijama u Iraku. "Ovi izuzetni vojnici rizikuju svoje živote i trebali bi sve u Bosni i Hercegovini učiniti ponosnim, pa je time zapanjujuće da su neki sa višim činovima i određeni političari spremni igrati političke igre i narušiti progres koji je postignut u jačanju komandovanja i kontrole nad oružanim

snagama na državnom nivou," rekao je visoki predstavnik.

"Predsjedništvo BiH je imalo ovlasti da djeluje. Posebno me brine što je gospodin Paravac potcijenio ozbiljnost ovog događaja, propustivši da osigura da odgovorni pojedinci u višem lancu komandovanja budu pozvani na odgovornost zbog ozbiljnog kršenja ustavnih obaveza VRS u sklopu oružanih snaga BiH", rekao je visoki predstavnik.